

佛七仪轨

● 莲池赞

莲池海会 弥陀如来 观音势至坐莲台

接引上金阶 大誓弘开 普愿离尘

埃 南无莲池会 菩萨摩訶萨

南无莲池会菩萨 摩訶萨南

无莲池会菩萨 摩訶萨

南无莲池会佛菩萨（三称）

佛说阿弥陀经

姚秦三藏法师鸠摩罗什奉诏译

如是我闻一时佛在舍卫国祇树给孤独园与大比丘僧千二百五十人俱皆是大阿罗汉众所知识长老舍利弗摩诃目犍连摩诃迦叶摩诃迦旃延摩诃俱絺罗离婆多周利盘陀伽难陀阿难陀罗睺罗骄梵波提宾头卢颇罗堕迦留陀夷摩诃劫宾那薄拘罗阿（少兔）楼驮如是等诸大弟子并诸菩萨摩诃萨文殊师利法王子阿逸多菩萨乾陀诃提菩萨常精进菩萨与如是等诸大菩萨及释提桓因等无量诸天大众俱尔时佛告长老舍利弗从是西方过十万亿佛土

有世界名曰极乐其土有佛号阿弥陀今现在说法舍利弗彼土何故名为极乐其国众生无有众苦但受诸乐故名极乐又舍利弗极乐国土七重栏楯七重罗网七重行树皆是四宝周匝围绕是故彼国名为极乐又舍利弗极乐国土有七宝池八功德水充满其中池底纯以金沙布地四边阶道金银琉璃玻璃合成上有楼阁亦以金银琉璃玻璃碎磔赤珠玛瑙而严饰之池中莲华大如车轮青色青光黄色黄光赤色赤光白色白光微妙香洁舍利弗极乐国土成就如是功德庄严又舍利弗彼佛国土常作天乐黄金为地昼夜六时雨天曼陀罗华其土众生常以清旦各以衣祴盛众妙华供养他方十万亿佛即以食时还到本国饭食经行舍利弗极乐国土成就如是功德庄严复次舍利弗彼国常有种种奇妙杂色之鸟白鹤孔雀鹦鹉舍利迦陵频伽共命之鸟是诸众鸟昼夜六时出和雅音其音演畅五根五力七菩提分八圣道分如是等法其土众生闻是音已皆悉念

佛念法念僧舍利弗汝勿谓此鸟实是罪报所生所以者何彼佛国土无三恶道舍利弗其佛国土尚无恶道之名何况有实是诸众鸟皆是阿弥陀佛欲令法音宣流变化所作舍利弗彼佛国土微风吹动诸宝行树及宝罗网出微妙音譬如百千种乐同时俱作闻是音者自然皆生念佛念法念僧之心舍利弗其佛国土成就如是功德庄严舍利弗于汝意云何彼佛何故号阿弥陀舍利弗彼佛光明无量照十方国无所障碍是故号为阿弥陀又舍利弗彼佛寿命及其人民无量无边阿僧祇劫故名阿弥陀舍利弗阿弥陀成佛以来于今十劫又舍利弗彼佛有无量无边声闻弟子皆阿罗汉非是算数之所能知诸菩萨众亦复如是舍利弗彼佛国土成就如是功德庄严又舍利弗极乐国土众生生者皆是阿鞞跋致其中多有一生补处其数甚多非是算数所能知之但可以无量无边阿僧祇说舍利弗众生闻者应当发愿愿生彼国所以者何得与如是诸上善人俱会一

处舍利弗不可以少善根福德因缘得生彼国 舍利弗若有善男子善女人闻说阿弥陀佛执持名号若一日若二日若三日若四日若五日若六日若七日一心不乱其人临命终时阿弥陀佛与诸圣众现在其前是人终时心不颠倒即得往生阿弥陀佛极乐国土 舍利弗我见是利故说此言若有众生闻是说者应当发愿生彼国土舍利弗如我今者赞叹阿弥陀佛不可思议功德之利东方亦有阿閼鞞佛须弥相佛大须弥佛须弥光佛妙音佛如是等恒河沙数诸佛各于其国出广长舌相遍覆三千大千世界说诚实言汝等众生当信是称赞不可思议功德一切诸佛所护念经 舍利弗南方世界有日月灯佛名闻光佛大焰肩佛须弥灯佛无量精进佛如是等恒河沙数诸佛各于其国出广长舌相遍覆三千大千世界说诚实言汝等众生当信是称赞不可思议功德一切诸佛所护念经舍利弗西方世界有无量寿佛无量相佛无量幢佛大光佛大明佛宝相佛

净光佛如是等恒河沙数诸佛各于其国出广长舌相遍覆三千大千世界说诚实言汝等众生当信是称赞不可思议功德一切诸佛所护念经舍利弗北方世界有焰肩佛最胜音佛难沮佛日生佛网明佛如是等恒河沙数诸佛各于其国出广长舌相遍覆三千大千世界说诚实言汝等众生当信是称赞不可思议功德一切诸佛所护念经舍利弗下方世界有师子佛名闻佛名光佛达摩佛法幢佛持法佛如是等恒河沙数诸佛各于其国出广长舌相遍覆三千大千世界说诚实言汝等众生当信是称赞不可思议功德一切诸佛所护念经舍利弗上方世界有梵音佛宿王佛香上佛香光佛大焰肩佛杂色宝华严身佛娑罗树王佛宝华德佛见一切义佛如须弥山佛如是等恒河沙数诸佛各于其国出广长舌相遍覆三千大千世界说诚实言汝等众生当信是称赞不可思议功德一切诸佛所护念经舍利弗于汝意云何何故名为一切诸佛所护念经舍利弗若有善

男子善女人闻是经受持者及闻诸佛名者是诸善男子善女人皆为一切诸佛之所护念皆得不退转于阿耨多罗三藐三菩提是故舍利弗汝等皆当信受我语及诸佛所说舍利弗若有人已发愿今发愿当发愿欲生阿弥陀佛国者是诸人等皆得不退转于阿耨多罗三藐三菩提于彼国土若已生若今生若当生是故舍利弗诸善男子善女人若有信者应当发愿生彼国土舍利弗如我今者称赞诸佛不可思议功德彼诸佛等亦称赞我不可思议功德而作是言释迦牟尼佛能为甚难希有之事能于娑婆国土五浊恶世一劫浊见浊烦恼浊众生浊命浊中得阿耨多罗三藐三菩提为诸众生说是一切世间难信之法舍利弗当知我于五浊恶世行此难事得阿耨多罗三藐三菩提为一切世间说此难信之法是为甚难佛说此经已舍利弗及诸比丘一切世间天人阿修罗等闻佛所说欢喜信受作礼而去

● 大阿弥陀赞

阿弥陀 大愿王 慈悲喜舍难量

眉间常放白毫光 度众生

极乐邦 八德池

中 莲九品 七宝妙树成行

如来圣号 若宣扬 接引 往西方

弥陀圣号 若称扬 同愿 往西方

● 赞佛偈

阿弥陀佛身金色 相好光明无等伦

白毫宛转五须弥 紺目澄清四大海

光中化佛无数亿 化菩萨众亦无边

四十八愿度众生 九品咸令登彼岸

南无西方极乐世界大慈大悲阿弥陀佛

南无阿弥陀(数百千声)

● 回向偈

愿生西方净土中

九品莲花为父母

花开见佛悟无生

不退菩萨为伴侣

礼佛

一心顶礼（鸣磬）弘扬净乐土、释迦如来、千百亿化身、遍法界诸佛（鸣磬）

一心顶礼常寂光净土、阿弥陀如来、清静妙法身、遍法界诸佛。（鸣磬）

一心顶礼实报庄严土、阿弥陀如来、微尘相海身、遍法界诸佛。（鸣磬）

一心顶礼方便圣居士、阿弥陀如来、解脱相严身、遍法界诸佛。（鸣磬）

一心顶礼西方安乐土、阿弥陀如来、大乘根界身、遍法界诸佛。（鸣磬）

一心顶礼西方安乐土、阿弥陀如来、十方化往身、遍法界诸佛。（鸣磬）

一心顶礼三十六万亿、一十一万九、千五百同名同号、阿弥陀佛。（三称）

一心顶礼（鸣磬）西方安乐土、教行理三经、及依正宣扬、遍法尊法。（鸣磬）

一心顶礼西方安乐土、观世音菩萨、万亿紫金身、遍法界菩萨摩訶萨。（鸣磬）

一心顶礼西方安乐土、大势至菩萨、无边光炽身、遍法界菩萨摩訶萨。（鸣磬）

一心顶礼西方安乐土、文殊菩萨、大智示现身、遍法界菩萨摩訶萨。（鸣磬）

一心顶礼西方安乐土、普贤菩萨、行愿刹尘身、遍法界菩萨摩訶萨。（鸣磬）

一心顶礼（鸣磬）西方安乐土、清静大海众、满分二严身、遍法界圣众（鸣磬）

西方发愿文

稽首西方安乐国，接引众生大导师。
我今发愿愿往生，惟愿慈悲哀摄受。

弟子众等，普为四恩三有、法界众生，求于诸佛一乘无上菩提道故，专心持念阿弥陀佛万德洪名，期生净土。又以业重福轻，障深慧浅，染心易炽，净德难成。今于佛前，翘勤五体，披沥一心，投诚忏悔。我及众生，旷劫至今，迷本净心，纵贪瞋痴。染秽三业，无量无边。所作罪垢，无量无边。所结冤业，愿悉消灭。从于今日，立深誓愿，远离恶法，誓不更造；勤修圣道，誓不退惰；誓成正觉；誓度众生。阿弥陀佛，以慈悲愿力，当证知我，当哀愍我，当加被我。愿禅观之中，梦寐之际，得见阿弥陀佛金色之身，得历阿弥陀佛宝严之土，得蒙阿弥陀佛甘露灌顶，光明照身，手摩我头，衣覆我体。使我宿障自

除，善根增长。疾空烦恼，顿破无明。圆觉妙心，廓然开悟。寂光真境，常得现前。至于临欲命终，预知时至。身无一切病苦厄难，心无一切贪恋迷惑。诸根悦豫，正念分明。舍报安详，如入禅定。阿弥陀佛，与观音、势至、诸圣贤众，放光接引，垂手提携。楼阁幢幡，异香天乐，西方圣境，昭示目前。令诸众生，见者闻者，欢喜感叹，发菩提心。我于尔时，乘金刚台，随从佛后，如弹指顷，生极乐国，七宝池内，胜莲华中。华开见佛，见诸菩萨，闻妙法音，获无生忍。于须臾间，承事诸佛，亲蒙授记。得授记已，三身四智，五眼六通，无量百千陀罗尼门，一切功德，皆悉成就。然后不违安养，回入娑婆。分身无数，遍十方刹。以不可思议自在神力，种种方便，度脱众生。咸令离染，还得净心。同生西方，人不退地。如是大愿，世界无尽，众生无尽，业及烦恼一切无尽，我愿无尽。愿今礼佛、发愿、修持功德，回施有情。四恩总报，三有齐资。法界众生，同圆种智。

佛七礼祖

顶礼西天东土历代祖师（鸣磬）

顶礼庐山初祖东林慧远公大师

顶礼长安二祖光明善导大师

顶礼南岳三祖般舟承远大师

顶礼长安四祖五会法照大师

顶礼新定五祖台严少康大师

顶礼永明六祖智觉延寿大师

顶礼昭庆七祖圆净省常大师

顶礼云栖八祖莲池株宏大师

顶礼北天目九祖灵峰旭公大师

顶礼虞山十祖普仁策公大师

顶礼杭州十一祖梵天贤公大师

顶礼红螺十二祖资福醒公大师

顶礼苏州十三祖灵岩圣量印光大师

顶礼古今莲社诸大善知识

各人代为父母师长，暨历劫怨亲，礼佛三拜，

现在者增福延寿过去者求生净土（鸣磬）。三答阿弥陀佛并礼佛

是日已过，
命亦随减，
如少水鱼，
斯有何乐。
大众，
当勤精进，
如救头燃，
但念无常，
慎勿放逸。

三归依

自归依佛，当愿众生，
体解大道，发无上心。
自归依法，当愿众生，
深入经藏，智慧如海。
自归依僧，当愿众生，
统领大众，一切无碍。
和南圣众